

Cette maison est vn abord de tout le Pays, où les Chrestiens y trouuent vn Hofpital durant leurs maladies, vn refuge au plus fort des alarmes, & vn hospice lors qu'ils nous viennent visiter. Nous y auons compté depuis vn an plus de trois mille personnes, aufquelles on a donné le giste, & quelquefois en quinze iours les six & les sept cens Chrestiens; & d'ordinaire trois repas à chacun. Sans y comprendre vn plus grand nombre qui sans cesse y passent tout le iour, aufquels on fait aussi la charité. En sorte que dans vn Pays estranger, nous y nourrissions ceux qui [16] deuroient nous y fournir eux-mesmes les necessitez de la vie.

Il est vray que ce n'est pas dans les delices ny l'abondance de la France. Le bled d'Inde pilé dans vn mortier & bouilly dedans l'eau, affaisonnée de quelque poisson enfumé, qui tient lieu de sel, estant reduit en poudre, nous sert ensemble de boire & de manger, & nous apprend que la Nature se contente de peu, nous fournissant Dieu mercy vne fanté moins sujette aux maladies, qu'elle ne feroit dans les richesses & la varieté des viures de l'Europe.

Il n'y a d'ordinaire que deux ou trois de nos Peres residens en cette maison, tous les autres sont diffipez dans les Missions, qui sont maintenant dix en nombre: les vnes plus arrestées dans les bourgs principaux du Pays; les autres plus errantes, vn seul Pere estant contraint de prendre le foin de dix & de douze bourgades; & quelques-vns allans plus loin, les quatrevingts & les cent lieuës, afin que toutes ces Nations soient esclairées en mesme temps des lumieres de l'Euangile.

Nous tafchons toutefois de nous rassembler tous,